



KEMENTERIAN PERALIHAN TENAGA  
DAN TRANSFORMASI AIR

## SIARAN MEDIA

### INISIATIF SOLAR@PETRA, PROGRAM SOLAR BOLEHI! MAMPU TINGKAT PENJANAAN SOLAR DAN BERI MANFAAT KEPADA RAKYAT

**SHAH ALAM, 6 MEI 2024** – Selaras dengan aspirasi negara untuk mengurangkan jejak karbon sektor bekalan elektrik negara, Kerajaan memperkenalkan Inisiatif Solar Peralihan Tenaga untuk Rakyat (**Inisiatif Solar@PETRA**) untuk menggalakkan lebih ramai rakyat untuk turut menyertai dan mendapat manfaat daripada agenda peralihan tenaga negara.

Inisiatif Solar@PETRA akan diterajui Kementerian Peralihan Tenaga dan Transformasi Air (PETRA) bersama dengan agensinya iaitu Suruhanjaya Tenaga (ST) dan Pihak Berkuasa Pembangunan Tenaga Lestari (SEDA) serta pihak berkepentingan lain. Pelaksanaannya bertujuan untuk memperluas serta meningkatkan pemasangan sistem solar PV di kalangan pengguna domestik melalui program dan skim khusus yang dirangka.

Sebagai pemangkin untuk meningkatkan capaian pengguna domestik terhadap skim pemasangan solar serta kemudahan pembiayaan yang tersedia di pasaran, Inisiatif Solar@PETRA akan dimulakan dan dilancarkan bersekali dengan **Program Solar BOLEHI!** Program ini adalah usaha sama di antara PETRA, AEON Company (M) Berhad, SOLS Energy dan Bank Simpanan Nasional yang bertujuan mempromosikan tawaran produk solar inovatif kepada pengguna domestik yang disediakan pihak swasta seperti berikut:

- (i) Langganan pemasangan sistem solar untuk rakyat yang boleh dilakukan secara mudah di cawangan-cawangan AEON di seluruh negara. Selain itu, Pemasangan sistem solar PV menerusi AEON akan mendapat 2 kali ganda mata ganjaran AEON, dan 100 pelanggan pertama akan memperolehi 40,000 mata ganjaran tambahan bersempena ulang tahun AEON ke-40. Usaha ini

bertujuan untuk memberi pengiktirafan dan manfaat kepada pelanggan yang prihatin serta menyumbang kepada kelestarian alam sekitar;

- (ii) Kemudahan pembiayaan solar oleh Bank Simpanan Nasional kepada kakitangan kerajaan melalui produk BSN MyRinggit-i panel Solar yang menawarkan kadar keuntungan yang kompetitif dan pembayaran balik boleh dilakukan melalui pemotongan gaji; dan
- (iii) Kemudahan langganan solar oleh SOLS Energy yang menyediakan kaedah pembiayaan solar berasaskan model sifar modal (zero capex) kepada pengguna domestik dan seterusnya menjadikan pemasangan solar mampu bayar untuk rakyat jelata.

Pelaksanaan Program Solar BOLEH! akan memudahkan lagi capaian rakyat yang berminat kepada skim pemasangan sistem solar PV yang ditawarkan di pasaran. Program ini juga adalah tambahan kepada Skim Insentif Solar Rakyat atau Solar for Rakyat Incentive Scheme (SolarIS) yang diperkenalkan Kerajaan pada bulan April 2024 dan sedang dilaksanakan oleh Tenaga Nasional Berhad.

Program Solar BOLEH! dan Skim Insentif Solar Rakyat atau Solar for Rakyat Incentive Scheme (SolarIS) merupakan program permulaan yang dilaksanakan di bawah Inisiatif Solar@PETRA. Pihak PETRA komited dalam merangka lebih banyak program dan inisiatif khusus bagi membolehkan lebih banyak rakyat mendapat manfaat daripada penerapan teknologi solar untuk penjanaan bekalan elektrik melalui pemasangan sistem solar PV di premis kediaman.

**KEMENTERIAN PERALIHAN TENAGA DAN TRANSFORMASI AIR**

**6 MEI 2024**

---

Unit Komunikasi Korporat | Kementerian Peralihan Tenaga dan Transformasi Air (PETRA)

Tel.: 03-8000 8000 | E-Mel: [ukk@petra.gov.my](mailto:ukk@petra.gov.my)

